

Jeneralaren antzezpena

Guardia Zibilaren eta bereziki Bayo eta Doradoren defentsa sutua egin zuen Rodriguez Galindok

Guardia Zibileko jeneralarena baino giza-seme hunkituaren itxura eman zuen atzo Enrique Rodriguez Galindok. Duela lau urte auzia martxan jarri zenean, Galindok esan zuen egunen batean deklaratzera joan behar bazuen militarrez jantzita eta domina guztiak soinean zituela joango zela. Garaia iritsita, ordea, nahiago izan zuen traje gris ilun batekin agertzea.

Galdeketa hasi orduko ikusi zen Galindok Felipe Bayo eta Enrique Doradoren alde egingo zuela, agian, lehenengoak orain arte eginiko deklarazioa aldatuko duen esperantzan. Izan ere, Bayok, Lasa eta Zabalaren galdeketa parte hartu zuela onartzeaz gain, Galindo, Elgorriaga eta Vaquero egin zituen horren erantzule. Deklaratzen hasi aurretik egin zituen Galindok lehenengo aldiz aipatu akusatuen aldeko hitzak: «Bihotzez sentitzen dut terrorismoaren kontrako borrokan izan ditudan bi gizonik hoberenak bizi duten egoera kaxkarra». Gero deklarazioan zehar horrelako ugari errepikatu zituen. «Nere atzean dauden gizonak ETaren biktimak dira. Ahal izan dudan guztietan galdetu dut haien egoeraren berri».



Enrique Rodriguez Galindo jenerala, fiskalaren galderei erantzunez.

Urrunago ere iritsi zen, Bayo eta Dorado tortura delituen-gatik zigortuta egon arren horrela mintzatu baitzen: «Nik baieztatzen du nire gizonak ez dutela torturatu, nahiz horregatik zigortuta egon». Bayo eta Dorado hain maiteak izanik, ordea, espediente jarri ondoren komandantzian lanean jarraitu zuten galdetuta, «ez dakit, ez dut uste», erantzun zuen.

Galindok erabilitako beste

errekurtso bat, garaiko gogortasuna azpimarratzea izan zen. 1980tik 1996ra Donostian egon zen bitartean bizi izan zituen urteak bere bizitzako gogorrenak izan zirela ere adierazi zuen Galindok. «Urtebete egin dut espetxean, baina ziurtatzen dut ez dela nere bizitzako urterik gogorrena izan». Halaber, dramatismo handiz kontatu zituen 1983ko zenbait atentatu fiskalari erantzunez.

Hasperen egin zuen Galindok kontatzen hasi aurretik: «Nola ahaztu. Guardia zibil bat hil zuten Errenterian, mehatxatua zegoen, baina Errenterian bizitzen jarraitu nahi zuela jakinarazi zidan eta esan zidan jakinarazteko goikoei ez zuela alde egin nahi. 48 ordu beranduago hilik zegoen. 48 ordu beranduago beste gizon bat Errenterian, zibil bat», hasperen sakona egin zuen eta horrela jarraitu: «okin bat hil zuten, bere okindegiaren aurrean hilik, euriak bere gorpua bustitzen zuen bitartean. Eta 48 ordu beranduago harakin bat Irunen, bakardadean eta dramatikoki bere txakurrak miazkatzen zuela, nola ez gogoratu jauna».

Guardia Zibilari buruz, ETak haien kontra eginiko atentatuak bakarrik ez, guardia zibilek bizi zuten «arriskua, soldata kaxkarra, bizileku txikiak» eta gabezia ugari aipatu zituen behin eta berriz, beti ere hasperen artean. Momentuaren larritasuna azaldu nahian esan zuen «Aberria arriskuan zegoen», eta maiatzaren 2ko fusilamendua aipatu zuen konparazioa egin nahian.

Axun Erzibengoa
MADRIL

Bi grabazio gaur entzungai

Iñigo Iruin akusazio partikularreko abokatuak bi zinten grabazioa entzutea eskatu zuen atzo, Galindorentzako galderak irakurri ostean. Bi zinta horietan Enrique Rodriguez Galindo eta Enrique Dorado Villalobosen arteko telefonozko bi elkarrizketa entzuten dira, eta Iñigo Iruinek zinta horiek entzutea eskatu zuen, ondoren horri buruzko hainbat galdera egin behar dizkiolako jeneralari. Atzo ez zituzten entzuteko prest, eta epaileak gaurko saioaren hasierarako presta zitezela eskatu zuen.

Baltasar Garzon epailea, adi-adi

Ez dira kazetari eta senideak epaigelan gertatzen denari adi-adi dauden bakarrik. Prentsarentzako egokitutako gelan, izan ere, atzo epaile eta fiskalen presentzia nabaria zen. Baina batez ere haietako batek izan zuen han bildutako kazetari guztien arreta. Baltasar Garzon epaileak fiskalak Galindori egin-dako galdera guztiak entzun zituen, adi-adi. Ia bi orduz egon zen zutik jeneralaren galderak entzuten, eta azkenerako kazetarien alboan lekua hartu zuen. Nekatuta-edo. GAL kasuko instrukzioak ez zuen galdutako nahi izan Lasa-Zabala kasuaren epaiketan gertatzen dena.

Felipe Bayok itxura hobeaz zeukan hirugarren egunean

Felipe Bayo Lealen egoera hobera egin duela dirudi. Atzo bezperan baino itxura hobeaz zuen, eta nahiko argi zegoela antzematen zitzaion. Aurreko egunarekin alderatuz, ileak ondo orraztuta eraman zituen, aulkian zuzen eserita zegoen eta, itxuraz, nahiko esna. Dena dela, oraindik gorpildun aulkian dihoa. Ikusi beharko da noiz izango den gai bere kabuz sartzeko. Galindok bere deklarazioan hainbeste alditan aipatu eta gero, ikusi egin beharko da haren laudorioak Bayoren egoera zenbaterainoko eragina duten.

Argudiatu behar ez dena argudiatzen

AKUSATUEK galderei ez erantzuteko eskubidea dute, eta pentsatzekoa zen Galindok ez ziola akusazioen galderei erantzungo. Eskubidea izanik, baina, ez du arrazoitu beharrik zergatik ez duen deklaritzen. Antza, Galindok ez zekien hori. Hala, Iñigo Iruinek lehen galdera bota orduko Galindok azaldu egin zuen zergatik ez zion erantzun nahi.

«Zuk nik borrokatu dudan guztia ordezkatzan duzu, eta nik borrokatu ditudan arrazoiengatik nire ehun gizon baino gehiago hil dira. Beraz, ez dut zure galdera bakar bat ere erantzungo», adierazi zuen. Epaileak ez zuen onartu Galindok eman arrazoiak: «Akusazio partikularreko abokatu jaunak bortxaz hildako bi pertsonen amak ordezkatzan ditu. Beraz, ez du zentzurik zuk eman duzun azalpenak». Epaileak aurretik eman arrazoiak balio-



Iñigo Iruin, Lasa eta Zabala sendien abokatuak, galderak egiten.

rik gabe utzi zuenez, Galindok beste arrazoi bat eman nahi izan zuen. «Errespetu osoa diet abokatu jaunak une honetan ordezkatzan dituen interesei. Baina, Iruin jauna HBko Mahai

Nazionalako kide da». Oker, berriro ere. Izan ere, Iñigo Iruin EHko legebiltzarkidea da, baina ez HBko Mahai Nazionalako kidea. Iruin hori argitzen saiatu zenean, epaileak ez zion utzi: «Ez, ez, ez. Epaitegi hau ez da eztabaida politikorako foro bat». Iruinek, hala ere, era azkar batean argitu ahal izan zuen ez zela Herri Batasunako mahaikidea. Tolosako Udala ordezkatzan duen herri akusazioko abokatuari ez erantzuteko beste arrazoi bat eman zuen Rodriguez Galindo jeneralak: «Herri akusazio honek ez du inoiz lan hori egin Tolosako nire gizonen bat hil dutenean, eta beraz ez diot erantzungo».

Eider Goenaga
MADRIL